

զոր պատրաստեալ էին յառաջագոյն, որոշեալ 'ի թղթի անդ գտեղիս իւրաքանչիւր ազգաց այլ և այլ գունով, որով ծանեան Դատաւորք գտեղիսն՝ եւ անաշխատ պարզեցաւ խնդիրն:

Հարցին Դատաւորք ցօոյնս, զի՞նչ ունիք առ այս պատասխանի. նոքա մատուցին զգաշնագիրն մեծին Օմարայ գրեալ 'ի թուին Հիճրէթի 15 'ի 20 Րէպիլէ Էվլէլ ամսոյ 'ի բարբառ Արարացոց. սովաւ տիրեալ եմք ասեն ամենայն տեղեաց մերոց և այլոց ազգաց. և առեալ ընթերցան և դարձուցին զայն առ նոսա, և ասեն՝ պահեցէք զայդ զի կարի հնագոյն է՝ և բազում աշխատութեանց պէտս ունի հաստատել զստուգութիւն դորա, զի զկնի Օմարայ՝ Լատինք, ապա Սալահատտին եւ զկնի Սուլթան Սէլիմ առաջին՝ տիրեցին Երուսաղէմի, և չունի պէտս ինչ յառաջակայ դատին ձերոյ. Յոյնք աղաչէին անսալ և քննել զիմաստս նորին. և եղև 'ի քննելն, գտին զայն շինծու և յարմարեալ՝ և ասացին, սուտ է այս, զի թիւ սորա կանխագոյն է քան զգահակալութիւն Օմարայ: Մատուցին զհրովարտակն Ֆաթի Սուլթան Մէհէմէտի ⁽¹⁾, տուեալ զկնի առման Կոստանդինուպօլսոյ. և զայն բնաւ ոչ ընթերցան, զի չէր հարկաւոր առ այն վէճ: Ապա հանին զհրովարտակս Սէլիմայ Արքայի եւ որդւոյ նորա Սիւլէյմանայ՝ զոր ընկալեալ ընթերցան՝ յորս գրեալ էին ամենայն վանօրսյք և տեղիք նոցա, բայց անհամաձայն արձանագրութեանց. 'ի հրովարտակին գրի Սըրպ եւ յարձանագրութեան Սիւրեան. թէպէտեւ ծանեան Դատաւորք, բայց Րէիզ Էֆէնտին ջատագով էր Յունաց: Փակեցաւ Ատեանն, և արձակեալ անտի Հայոց, եկին 'ի Հասան Փաշա խան, ուր սպասէին բազմութիւն գլխաւորաց եւ Ժողովրդոց ընդ Պատրիարքին՝ լսել ինչ 'ի նոցանէ: Եւ նոքա պատմեցին նոցա զոր ասացին և լուան: Եւ զի ազգն Հայոց առհասարակ կանխեալ էին յաղթս, և պատուէր ստէպ լինէր յեկեղեցիս չտալ տեղի նախատական բանիցն Յունաց և չգրգռիլ 'ի կռիւ ընդդէմ միմեանց,

(1) Այս հրովարտակ 'ի մեծի հրկիզութեան մայրաքաղաքին այրեցաւ: Տես կենսագրութիւն Սուլթան Սէլիմի Տաճկերէն. Երէ* 79: